

Entrevista exclusivo cu e "King of Soca" Arrow...

ARUBA TIN MUSICONAN DI HALTO NIVEL!..



**** Alphonse "Arrow" Cassell** mundialmente famoso pa su inmortal Soca hit "FEELING HOT-

HOT", a declara durante un entrevista exclusivo cu DEN AMBIENTE, cu despues di su ultimo bishita aki na Aruba na aña 1982, e la nota un adelanto increible di nos musiconan.

E "King of Soca" tin palabranan di elogio pa nos bandanan musical cu e tabatin e oportunidad pa skucha, cualnan tabata Papito y su Doble Sabor, Super Orquesta Qua-si, y tambe Eclipse.

Arrow ta haya cu Aruba tin hopi bon musico, cu tin tur e potencialnan pa presenta den exterior. Tambe nos musiconan tin e caliber pa acompaña cualkier artista internacional. Sinceramente Arrow ta bisa DEN

AMBIENTE, "enrealidad, e musiconan di Aruba a sorprende mi persona pa nan forma profesional cu ta riba un nivel halto".

Riba e pregunta di DEN AMBIENTE si tin posibilidad pa un musico local por forma parti di su orquesta? Arrow a contesta cu esaki por ta posibel, ya cu e la nota cu un musico di Aruba por domina e ritmo di Soca excelentemente. Tambe Arrow a duna di conoce cu den su orquesta e tin musiconan di diferente paisnan manera e.o, Argentina, Trinidad, Dominica, St.Kits y Montserrat. Cu un musico Arubano aserca, su orquesta lo ta un multi-international band.

Segun Arrow...

"SAK'E BOEM" POR RESULTA DEN UN HIT INTERNACIONAL...

**** Tambe e "king of Soca"** Arrow a declara durante entrevista cu e tremendo hit di Claudius Philips "Sak'e Boem Boem" tin tur e ingredientenan pa resulta den un hit grandi riba cartelanan internacional.

Arrow a duna DEN AMBIENTE di conoce cu tabata na hermana isla Corsow na unda e la duna un presen-

tacion, cu e la bin sera conoci cu "Sak'e Boem Boem". Segun Arrow cu "Sak'e Boem Boem" tin su "sweetkick" pa ser un hit grandi.

Tur locual Claudius mester hasi, ta pusha e "Boem Boem" den mas pais cu ta posibel, y sinta carga pasenshi, pasobra e chensnan ta mas grandi cu Claudius mes

no ta spera.

Arrow ta conseha Claudius cu tur cos ta den su man, pero e mester lucha, sacrifica y persevera te ora logra realisa e "Boem Boem" aki den un hit internacional.

Awor mas cu nunca! mester traha duro riba e trabao mas importante cu ta esun di promocion, asina Arrow a declara na DEN AMBIENTE.



**** E dama riba e tenor sax aki ta forma parti di e brass seccion di Arrow. Su nomber ta Cecilia Tenconi y ta procedente di Argentina. Cecilia tin cinco aña ta formando parti di e brass seccion di Arrow. Cecilia a studia vocals-flutes y tenor sax na Berklee College of Music na Boston.**

Gracias di su bishita na Aruba na aña 1982..

"FEELING HOT-HOT" A SER INSPIRA NA HULANDA...



**** Durante entrevista** Arrow ta declara na DEN AMBIENTE, cu e mester GRADICI ARUBA, muy especial e promotor Ceryl Granoogst, pa su exitoso hit inmortal "FEELING HOT-HOT".

Segun e "King of Soca" cu tabata durante su presentacion aki na Aruba na aña 1982 den Contempo disco, cu Ceryl Granoogst a ofrece un contract pa algun presentacion na Hulanda. For di Aruba e la viaha pa Hulanda cu su coristanan, y na Hulanda e la ser acompaña pa e orquesta BESS di e popular cantante e tempo ey Babalu.

Tabata durante un presentacion den un di e club nocturno na Hulanda, cu e la cuminsa soda ya cu tabata hasi hopi calor. Arrow a nota tambe cu tur hende tabata pata pata soda, y e la haya un inspiracion di cuminsa canta "Feeling hot-hot". Instantemente tur hende a cuminsa ta basila riba e tema "Feeling hot-hot". Despues cu e la nota cu esaki a "catch" e publico, nan a improvisa den un style di jam riba "Feeling hot-hot".

Na caminda den avion pa su pais Plymouth, Montserrat, West-Indies, e la sigui traha riba e cancion aki. Inmediatamente e la drenta den studio pa graba e pieza aki, cual e mes no a spera di por a conquista un exito mundial.

E exito di "Feeling Hot-Hot" a hasi Arrow un millonario, ya cu te ainda e super exitoso "hot-hot" aki ta bendiendo y a surpasa mas cu **12 MIYON COPIA**. Imaginabo cu Arrow ta gana 1 Dollar di royalties riba cada copia, anto esey so ta suficiente pa e ta un millonario.

Anto ketu bay "Feeling hot-hot" concidera como e himno nacional di "Soca Music" ta ser solicita. Arrow tambe a musta DEN AMBIENTE e revista Musical Billboard na unda "Feeling hot-hot" ta aparece riba number 9 riba hitparade na Australia.

Na final di e entrevista exclusivo aki, Arrow a declara cu si e no a bishita Aruba y sera conoci cu Ceryl Granoogst, "Feeling hot-hot" hamas por ta existi.